

大正藏第 02 册 No. 0115

佛说马有八态譬人经 1 卷

No. 115 [No. 99(924), No. 100(149)]

佛说马有八态譬人经(出杂阿含别译)

后汉西域三藏支曜译

闻如是：

一时，佛在舍卫国行在祇树给孤独园，多比丘僧俱。佛告诸比丘：「马有弊恶态八。何等八？一态者解羈缰时便掣车欲走；二态者驾车跳[跳-兆+梁]欲啮人；三态者便举前两脚掣车走；四态者便躅车軛；五态者便人立持轭摩抄车却行；六态者便傍行邪走；七态者便掣车驰走，得浊泥抵止住不复行；八态者悬箠餒之熟视不肯食，其主牵去欲驾之，遽唵噲噬欲食不能得食。」

佛言：「人亦有弊恶态八。何等为八？一态者闻说经便走不欲听，如马解羈缰掣车走时；二态者闻说经意不解，不知语所趣向，便瞋跳[跳-兆+梁]不欲闻，如马驾车时跳[跳-兆+梁]欲啮人时；三态者闻说经便逆不受，如马举前两脚掣车走时；四态者闻说经便骂，如马躅车軛时；五态者闻说经便起去，如马人立持轭摩抄车却行时；六态者闻说经不肯听，[卑*页]头邪视耳语，如马傍行邪走时；七态者闻说经便欲穷难，问之不能相应答，便死抵妄语，如马得浊泥便止不复行时；八态者闻说经不肯听，反念淫泆多求不欲听受，死入恶道时，乃遽欲学问行道，亦不能复得行道，如马悬箠餒之熟视不肯食，其主牵去欲驾之，乃遽唵噲噬亦不得食。」

佛言：「我说马八态，恶人亦有八恶态如是。」

诸比丘闻经欢喜，作礼而去。

佛说马有八态譬人经

【经文信息】 大正藏第 02 册 No. 0115 佛说马有八态譬人经
【版本记录】 CBETA 电子佛典 Rev. 1.11 (Big5), 完成日期: 2010/11/04
【编辑说明】 本数据库由中华电子佛典协会 (CBETA) 依大正藏所编辑
【原始数据】 萧镇国大德提供 / 张文明大德二校, 维习安大德提供, 北美某大德提供, 法雨道场提供新式标点
【其他事项】 本数据库可自由免费流通, 详细内容请参阅**【中华电子佛典协会数据库版权宣告】**
